



Fédération des Enseignants de Langue et Culture d'Occitanie  
de l'Éducation Nationale  
(académies de Nice, Aix-Marseille, Grenoble, Clermont-Ferrand,  
Montpellier, Toulouse, Bordeaux, Limoges, Poitiers, Ile de France)  
Federacion dels Ensenhaires de Lengua e Cultura d'Òc

**Butletín n°311**  
**12/08/2010**

## **FELCO 311 Amassada Generala de la FELCO. Rodés, 29 de julhet de 2010**

### **Òrdre del jorn :**

#### **- “Anem òc” :**

- cossí contunhar après la capitada de la tresena manifestacion ?
- Plaça de l'ensenhament public dins la coordinacion.
- Rendut compte de l'amassada de Carcassona 12 de junh. Quin mandat per la FELCO a l'amassada venenta d'Anem Oc (fin de setembre) ?
- Contactes amb IEO e Felibrige.

#### **- Situacion de l'ensenhament public dins las acadèmias, avançadas e blocatges**

#### **- Quinas accions per la FELCO ?**

- Proposicion de lei, posicion FELCO e rendut compte del Forum de Lengon (27 de julhet 2010)
- Visibilitat de l'associacion
- Vida intèrna
- Elements per un RDV al Ministèri :

### **“Anem òc” :**

Tot lo mond es consent per salutar l'avançada societala de las manifs. Es lo primièr còp qu'avèm vistes tantes milhierats de personas per carrièras sus la question de la lenga, e la FELCO a largament contribuit a noirir intellectualament e practicament « Anem òc ». Lo bilanç d'aquela accion comuna es largament positiu : totes amassa amb los autres partenaris, podem dire qu'avèm més 25000 personas per carrièras. La capitada d'Anem, Òc es estada deguda a la volontat de l'IEO e a sa fòrça d'accion (direccion politica + malhum de salariats) ; es estada tanben deguda a la volontat d'avançar d'un biais consensual, mai que mai amb lo Felibrige.

**MJV rend compte de l'acamp « Anem, Òc » del 12 de junh a Carcassona** (pel moment, aqueste aguèt pas de rendut compte oficial). I èran representats IEO, FELCO e Felibrige :

1- De segur que se i parlèt d'estrategia per l'occitanisme e mai que mai de la novèla situacion dins los Conselhs regionals amb de novèls elegits encargats de l'occitan. L'accion d'aquestes aurà de tot segur besonh d'un moviment associatiu fòrt, mai que

mai al nivèl de l'IEO, sens quitar de vista l'amira de l'accion consensuala.

2- Se i decidiguèt lo mandadís d'un comunicat comun (cf. en annèx.). Los collègas an tota libertat per lo difusir a son entorn, e mai lor es demandat. Dos elements fòrts d'aquel comunicat :

- decision comuna de contunhar l'accion e la reflexion, mai que mai a l'entorn del projècte de proposicion de lei ;
- declaracion cap als novèls Conselhs Regionals : « Anem, òc » seguirà de pròche las avançadas del projèctes d'ajuda a nòstra lenga.

3- I aguèt una proposicion del Felibrige de Caus (pel majoral Patrick Delmas qu'es tanben president del Cercle Occitan local) d'organizar una manif sus plaça amb l'apòrt de 5000 (o benlèu 6000) euros...

### **Discussion a l'AG de la FELCO**

- L'idèa torna de l'organizacion d'un eveniment especial a París ambe lo monde de las autres lengas lengas istoricas. Causir un luòc simbolic : Acadèmia francesa, amassada nacional, l'UNESCO...

- Sus las manif al país : segur que donan de plaser a los que manifestan, mas demandan un trabalh fòl e lo govèrn se'n chauta ! De ne faire mai d'una es préner la risca de ramosar mens !

- Pels nòstres elegits, lo nombre de 25 000 manifestants es una bona causa mas pel govèrn es pas productiu. Nòstre ministèri, dison d'unes, se trufa de nautres ara que jamai. Li cal far crença a París.

- Se ditz que de recomençar de manif d'un biais ritual es una mena d'onanisme...

- Sus una manif amb las autras lengas, doas joves collègas dison sa crença que lo territòri occitan i siá negat. Per anar dins aquel sens tot reconèisser la necessitat de se recampar sus de causas comunas, MJV ditz que lo tèxt adoptat fins ara per la coordinacion de las lengas manca de visibilitat e de coeréncia : sembla un pegatge de mots d'òrdre eterogèns amb la volontat de « surenchère » dels uns e dels autres.

- L'organizacion d'una quatrena manif sembla a d'unes « d'onanisme ». Lo nombre es comparat als 20 000 que participan a la felibrejada del Bornat de Peiregòrd e que son nombre auria pas d'impact sus la situacion de la lenga (remarca MJV d'après l'AG : pas segur ! Vist d'en defòra, la situacion de la lenga en Peiregòrd a un imatge mai positiu qu'endacòm mai, coma o pròva l'engatjament dels elegits locals o aquel de la Ligue de l'Enseignement :

cf : <http://www.laligue24.org/docs/mont/diasporique.pdf>

<http://www.infoconcert.com/festival/festival-de-montignac-2505/presentation.html>

<http://www.laligue24.org/docs/prog-seminaire-2010.pdf>)

### **Sintèsi e decision collectiva**

**Las accions nòstras an doas tòcas :** tocar lo poder central e sensibilizar la populacion e los elegits. Aquelas doas tòcas apèlan pas forçadament las memas accions. Se cal de'n primièr pausar la question de l'objectiu / dels objectius.

- **Una manif a París :** interès mediatic e recampament amb las autras lengas. Mas sus quin programa ? Per d'unes lo poder es a París e cal jogar ambe las armas del moment ont vivèm. Pasmens manifestar a París supausa de mobilisar una còla d'organizacion, de mobilizar mejans financers autres que per lo nivèl local e perquè pas d'emplegar una persona per aquela accion. Aquela accion es un mejan de

quichar sul sol nivèl que pren pas en consideracion lo nivèl regional dins l'amira de la decentralizacion mas tanplan de la deconcentracion de l'Estat : es a dire lo nivèl del govèrn e de sos ministèris, aquel de l'Educacion Nacionala en cap, que negligís lo resson de Carcassona II. Al punt de la situacion ont sèm ambe los enjòcs que se pausan uèi lo jorn, fa mestier d'agir sul plan simbolic. Cal s'inscriure dins la comunicacion e dins la mediatizacion nacionala.

- **Una manif / de manifs al país** : las manifs al país an recampat e pòdon recampar encara mai de mond de la societat civila que son pas de militants mas que son sensibles a las questions que pausam. Aquò dona un vam festiu als militants e a las associacions, porgís arguments cap als elegits (« avèm ramosat 25 mila personas »), renfortís lo nivèl local e regional de nòstra accion militanta e respond a una espèra fòrta dels militants de basa.

Seriá benlèu una idèa nòva d'organizar de manifs mai pròchas del terrenh, aquí ont son lo mond e los elegits. Sembla qu'una granda part dels blocatges venon de Provença : 25 deputats an pausadas de questions escrichas per que lo provençal siá reconegut coma una lenga diferenta... S'expausa l'idèa de 3 gròssas manifestacions: una en Provença, una en Lengadòc (Caus, puèi qu'avèm una proposicion) e una en Aquitània se los Aquitans pensan que Caus es luenh. Coma es important de mostrar l'unitat, se l'idèa es retenguda, caldrà que la comunicacion siá comuna e faga veire la convergència d'aqueles recampaments. Pas de tabó per emplegar en Provença lo mot « lenga d'òc » se pareis mai consensual. Necessitat principala per capitar una accion d'aquela mena : que i aja sus plaça, cada còp, una còla eficaça e dinamica per l'organizacion materiala e subretot que lo trabalh de comunicacion mòstre plan la CONVERGENCIA de l'accion.

Donc, costat FELCO aimariam de poder associar una accion simbolica a París que nos sembla importanta e los rescontres estrambordaires e festius sul terrenh regional dins l'encastre d'una manifestacion / de manifestacions.

La FELCO portarà aquelas proposicions concrètas mas de segur que la decision politica, las modalitats practicas e tecnicas son de discutir al nivèl d'Anem òc e ambe las autras associacions representativas de las lengas de França. Pasmens, per mai d'un, tot aquò serà pas benlèu de bon far abans la presidencials... Aquelas ipotesis son formuladas dins lo contèxte actual que's plan critic al nivèl linguistic, educatiu e fòrça complèxe al nivèl politic entre la preparacion de lei de decentralizacion, la reflexion de l'inter grop subre las lengas de França de l'Amassada nacionala e la promessa de lei del govèrn en seguida de la modificacion constitucionala de 2008, sens parlar de la data de 2012 que se sarra.

### **Acamp informal IEO/FELCO/Felibrige**

Un acamp es estat organizat a l'Estivada ambe lo president de l'IEO nacional, lo Baile del Felibrige e lo secretariat de la FELCO. L'atencion es estada tirada sus la situacion de Provença, amb las manòbras diviseiras del Couleitiu Prouvènço (<http://www.collectifprovence.com/>).

Decision foguèt presa de mandar una letra comuna IEO/FELCO/Felibrige al psdt de Region Provença per lo mercejar de son mot dins lo programa d'Estivada ont emplega l'expression « langue d'oc » al singular e li demandar audiéncia comuna de las tres associacions.

Decision foguèt presa de discutir a la basa de nòstras associacions sus l'oportunitat d'una accion de massa en Provença.

Après una debuta tibatada, l'acamp se's plan acabat e permetèt de clarificar las relacions entre los tres moviments.

## **Situacion de l'ensenhament public dins las acadèmias : avançadas e blocatges**

La question que torna es aquela dels pòstes al CAPES. La batèsta sus aquò, e mai aja largament mobilizat dins e a l'entorn de la FELCO la societat e los elegits, a agut d'unes efieches contraproductius e a descorat d'unes joves de causar aquela dralha professionala...

Coma tostemps, la situacion es plan diversa e desparièra entre las acadèmias e los ròdols sens parlar dels tres nivèls de formacion primari, segondari e superior.

### **Bordèu :**

Los collègas presents representavan puslèu lo nòrd de l'Acadèmia... Degun de Bearn...

Manca d'estudiants a la facultat per assegurar lo desenvolopament de l'ensenhament. D'unes critican la convencion signada entre la Region e lo Rectorat que pòt pas èsser aplicada sens mejans. S'espèra que lo cambiament de Rector siá escasença d'avançadas. La necessitat de demarchas cap als elegits es evocada.

Per trobar de vacataris, cal que lo CREO prepaue de personas al Rectorat e mai se estimarián aver mai de pòstes al CAPES.

Dins Dordonha, pel moment i a de collègas fòrça motivats mai i vai aver un pb gròs amb de partenças a la retirada.

Dins lo segond gra, avèm après, dempuèi l'AG, que lo Ministèri aviá finalament respondut per la negativa a la demanda del Rector de Bordèu de rapatriar en Peiregòrd un collèga novèlament certificat mandat en Provença...

La situacion es desparièra entre departaments : dins lo 64, sembla que la convencion foncione plan (remarca MJV : pasmens, degun del 64 èra present a l'AG...); dins lo 33 es complicat coma dins lo 47 ! cap establiment vòlon pas dubrir e manca de mejans.

### **Tolosa :**

Al CAEOC las causas son plan dichas e lo dialògue entre region, departament, rectorat e responsables associatius se passa puslèu plan.

La region signèt ambe lo rectorat una convencion en decembre passat e las causas avançan mas dapasset.

Primièr gra :

- sensibilizacion / iniciacion : efectius aumentan pauc o estagnan. Demòra una situacion de concurréncia entre LV e LR.

- ensenhament bi : **dubèrtura de 6 seccions bilinguas novèlas** a la dintrada 2010. Mas las situacions son plan diferentas d'un departament a l'autre ; en Avairon se dubrisson 3 seccions bilinguas a la dintrada, 1 dins Gèrs o Arièja, e en Tarn-e-Garona pas de creacion per exemple.

- Los pòstes del CRPE son de 8 en 2009, 10 en 2010 e seràn portats a 12 en 2011. Formacion : demanda de metre de pòstes d'occitan sus la lista generalista !

Segond gra :

- Coneissèm pas tròp la situacion e demòra de ramosar las informacions al prèp dels collègas. Çò que podèm dire : lo problèma desl pòstes al CAPES demòra l'empacha

màger del desvolopament de l'ensenhament. En mai d'aquò i a los desparts en retirada, lo nombre d'oras que demesís pas (mas i a pas d'ora presas sus las Dotacions Globalas Oràrias).

- Los efectius d'escolans baissan per la 4<sup>ena</sup> annada a de reng. Tornam al nivèl de 2004-2005. Coma per asard es l'annada de la baixa dels pòstes al CAPES ! Lo nombre d'establiments demesís tanben de 183 a 172 !

Un bilanç per l'annada puslèu mejan amb d'avançadas politicas importantas mas que semblan pas se metre en plaça sul terrenh pertot. Lo malhum del territòri es pas assegurat.

### **Montpelhièr :**

Primièr gra : malgrat una creissença importanta dempuèi 2 ans manca encara d'estudiants al concors especific CRPE, **pas cap de dubèrtura de sit bilingue a la dintrada 2010**. Fauta dels IA ? O retard sus aquela question... Dins l'Acadèmia de Montpelhièr, los collègas del primièr gra fan un trabalh enòrme sus la sensibilizacion e l'iniciacion a la lenga e pensan que lo nombre d'escolans e de mètres tocats es tant (mai ?) important que l'avançada del bilinguisme.

Formacion contunhada dels mètres : refús de pagar los desplaçaments per l'estagi de formacion.

Formacion iniciala e masterizacion : l'IUFM formarà los mètres del 1<sup>er</sup> gra e la fac los del segond gra.

Segond gra : problèma crucial del nombre de pòstes : pas de mejans de remplaçaments, impossibilitat d'assegurar l'existent. Exemple de Gard ont dos congiers meton en dangièr l'ensenhament dins 5 establiments.

Una bona causa es la dubèrtura de la Seccion bilingue al licèu de Carcassona.

### **Lemòtges, Clarmont :**

En Auvèrnhe, i a pas encara de convencion e l'objectiu es 2014. Dinc Cantal, lo CREO es membre amb d'autres (l'IEO mai que mai) del collectiu occitan e de trabalh se fai cap als elegits (conselh general e conselh regional). Lo 20 de julhet una delegacion rescontrèt P. Jarlier, Senator-conse de St Flor, per far avançar las causas. Cf. CR : [http://www.felco-creo.org/mdoc/detail\\_fr.php?categ=collec&id=556](http://www.felco-creo.org/mdoc/detail_fr.php?categ=collec&id=556)

### **Ròse Aups.**

La situacion de l'ensenhament public es encara flaca, mai lo trabalh de convencionament amb la Region Ròse-Aups avança. I a d'ensenhament de l'occitan dins 3 collègis e la situacion se melhora al licèu de Nions.

I a pas d'ensenhament a l'IUFM. Avèm besonh de conselhs per trabalhar amb la Region.

D'un biais general, dins lo Nòrd occitan, la situacion es encara mai que flaca (IUFM, Universitats ont i a pas de cursus complet, abséncia de sits bilingues publics, pas de CALR...)

### **Quinas accions per la FELCO ?**

**Proposicion de lei :** Rendut compte per E. Bordoncle que i representava la FELCO del Forum de Lengon (27 de julhet 2010)

Dins l'encastre del festenal « Les nuits atypiques de Langon » lo dimars 27 de julhet se debanèt a Lengon, lo segond forum de las lengas de França bailejat per lo Patric

Lavaud. La jornada se's organizada en doas partidas : lo matin que presentèt las politicas linguïsticas e lo vèspre l'interés de discutir e votar una lei per las lengas de França. Los intervenents èran doas deputadas (Martine Faure de Gironda, vici-presidenta del grop d'estudi sobre las lengas de França e Colette Langlade de Dordonha) e un senator (Claude Béri-Debat de Dordonha), totes tres d'Aquitània.

**Taula redonda : "Quelle politique linguistique est possible dans le cadre juridique actuel ? Etat des lieux, perspectives et limites",** amb : Jean-François Baldi, delegat general adjunt de la DGLFLF, Ministèri de la Cultura, Max Brisson, president de l'Offici Public de la Lenga Basca, vici-president del Conselh general dels Pirenèus Atlantics, 1<sup>er</sup> adjunt de la vila de Biarritz, David Grosclaude, conselhièr regional d'Aquitània, delegat a las lengas e culturas regionalas e Paxkal Indo, secretari general d'Eskolin, president de Seaska.

Aquesta matinada foguèt interessanta per veire lo camin que demòra de far per rapòrt als Bascos per exemple mas cal pas amagar o biaisar la realitat que tot es pas ròse ! Puèi d'autres exemples foguèron donats.

**Lo vèspre : Taula redonda : "Pourquoi une loi sur les langues régionales est-elle nécessaire ? Quel contenu donner à la loi ?"**

Mai que mai foguèt interessant de veire las posicions dels uns e dels autres sobre aquel projècte de proposicion de lei (es a dire una idèia que ven de l'Assemblada nacionala, qu'un projècte de lei ven del govèrn). Çò fach lo vèspre foguèt l'espepissatge del tèxte elaborat pel grop d'estudi parlamentari. La mocion de la FELCO foguèt plan recebuda ambe atencion e consideracion, çò que pròva la valor del trabalh nòstre.

Los intervenents an esmendat lo tèxte en prepausar als deputats unas modificacions. La màger residís dins l'article 5 de la commision de seguit de las situacions de las lengas, que remplaçariá lo conselh creat per L. Fabius en 1985 e que demorèt bufèc. Aquí se prepausèt de far una mena de conselh tecnic que ramosariá los responsables dels oficis publics de las lengas un còp creats. De ne far un utís puslèu tecnic que non pas una instància representativa que seriá tròp pesugassa.

Los debats insistiguèron sul fach que l'Estat deu èstre un responsable scientific e un garant juridic de la politica linguïstica e que mai que mai deu demorar implicat dins La Politica linguïstica de França quitament se las regions dins aquel tèxte tenon un ròtle important.

Claude Béri-Débat insistiguèt sul fach de quichar per formar e butar a se constituir un grop parièr a lo de l'Assemblada nacionala sobre lo sicut de las lengas de França. Per aquò cal contactar los presidents de grop dels partits presents al Senat. Contactar BEL (senator d'Arièja e president del grop socialist del Senat) e trobar senators de l'UMP, per tal de formr un grop subre-partisan.

Associacion dels conses coma lo de Besièrs ! qu'es senator.

### **Visibilitat de l'associacion :**

Lo sit sembla d'èsser una aisina que fonciona. Los elements que conten permeton, lèu, de donar d'elements de responsa sus tot plen de subjèctes. Entre agost 2009 e agost 2010, aguèt quasi 12 000 visitas. Es benlèu pas encara pro referenciat. MJV i trabalha amb E. Seguiet, la mèstra fialaira benevòla. Tot lo mond, de segur, i pòt mandar d'articles (un tèxte en word o odt o rtf o txt, un imatge jpg + 1 o 2 PJ dins quin format que siá. Causir un títol « parlaire »).

La necessitat se fai sentir d'un document papièr de donar, per exemple, a d'elegits que seriá una carta de visita de l'associacion. Aquel document poiriá tanben presentar l'associacion a de collègas futurs adherents. Question : fargar un document unenc a destinacion intèrna FELCO e extèrna o dos documents diferents ?

Sus l'Estivada 2011 : serà demandat un aïral comun « ensenhament public » ambe Òc-bi, escòlas bilingas, CAPOC-CRDP de Bordèu, etc...

**Costat direccion FELCO**, sèm dins una passa de besonh vertadièr amb trabalh partajat per que es encara tròp concentrat sus Montpelhièr e l'universitat...

Los dorsièrs son trabalhats (cf. seguit de las 145 questions escrichas de deputats e 45 de senadors).

**Demanda als collègas de nos ajudar :**

- a bastir e seguir los dorsièrs en far remontar las informacions. Se servir per exemple del document junt que fai lo punt sus las situacions academicas.
- a seguir las demandas als elegits sus plaça, en quichar suls dorsièrs mandats per la FELCO. !

La preséncia a l'AG d'un vintenat de personas amb a l'encòp de retirats que sos conselhs experimentats son precioses e de la jove generacion (dos novèls titularis dels concorses) mòstra pasmens que la cadena contunha e mai se d'unes collègas se sentisson encara mai d'aise sus un terrenh geograficament mai limitat e se la FELCO lor sembla un pauc tròp luènh de sas preocupacions quotidianas. Amb aquò i a la dificultat d'articular lo trabalh entre acadèmias : téner l'espaci dins la continuitat es dificil ! I a pasmens de seccions academicas o puslèu de departaments (exemple de Dordonha que seguisson las accions cap als mèdias e als elegits e que mandan informacions a la FELCO).

**Per una audiéncia a París, los problèmas de metre en dabans :**

Sèm pas tornats al Ministèri dempuèi febrèr de 2010 amb la FLAREP. Cal tornar a París per far conéisser l'actualitat dels problèmas. Demanda al CREO Miègjorn-Pirenèus de nos ajudar a bastir un dorsièr per la debuta de 2011. Lo dorsièr aprestat per aquò poirà servir tanben de basa per escriure als deputats e als presidents de Region.

Efèctivament, la situacion de nòstre ensenhament, ja complicada, se plaça dins un encastre politic general catastrofic : bassa generala dels pòstes als concorses :

- exemple de Tolosa passat de 240 pòstes a 90 al CRPE e de 10 a 8 al CRPE especial!). Aquela bassa aflaquis las campanhas de motivacions fachas per las Regions.

- exemple d'Aquitània ont i a agut 12 pòstes al concors especific 2010: 6 pel basc al concors extèrne especial + 3 al concors interne especial (1/2 departament), e son que 3 per l'occitan (4 departaments) ! per la session 2011, seràn son que 5 pòstas per las doas lengas...

Aqueles exemples mòstran plan que, quina que siá la volontat (mai o mens bona... dels Rectors) se tuertan a la demesida globala dels pòstes creats pel Ministèri...

Es evocat tanben lo problèma de la Masterizacion impausada per estalviar de moneda (un an d'estudis de mai non pagats) e que manda los collègas sul terrenh sens formacion. D'autra part limitada – per de rasons d'argent – lo nombre de candidats al concors. Totes an pas los mejans de se pagar un an d'estudi de mai.

La possibilitat es evocada de demandar que d'elegits sián recebuts al Ministèri amb la delegacion FELCO. Nos cal tanben comptar sus l'ajuda de las Regions, mai que mai aquelas qu'an signadas de convencions

#### **Qualques revendicacions importantas :**

- tornar sus l'augmentacion dels pòstes al CAPES e al CRPE especial
- tornar sus los blocatges departimentals e/o academics per la dubertura de sítis bilingues
- tornar sus las situacions de caréncias concrètas amb d'EXEMPLES.

#### **Condicions de trabalh dels collègas e militantisme**

Sul terrenh los collègas fan fòrça ! Es, dins d'unes cases, una situacion de VRP ! mas sens lo CAPES VRP !!! Aquò explica tanben la manca d'ajuda dins l'associacion.

Remarca d'un « vièlh » : Las generacions son mai o mens militantas... que's una temperatura sociala generala. Ara se pensa que la vida personala es mai importanta que la professionala. Al primièr acamp d'un IUFM es estat dich « sètz professor pas de militants ! » Mas èstre professor d'occitan es venir un professor pas completament coma los autres !

D'unes insistisson sus l'interès de difusir l'informacion del 2<sup>nd</sup> gra al 1<sup>er</sup>. Per aquò, cal bastir un argumentari, estent que i a una concurréncia entre Seccions bilingues e section « bilangues ».

Al nivèl del segond gra, sembla que i aja accòrd larg dels collègas per dire qu'al dessús de 2 establiments lo trabalh es pas eficaç. Problèma : cossí comolar los trauca laissats per las retiradas o los « abandons » de carrièra ?

Dins d'una acadèmias (Aquitània) lo CREO n'es a cercar de contractuals. Tot lo mond sap qu'es una causa problematica, qu'es un estatut inadmissible, qu'aquel mond an cap de formacion, mas cossí faire ? S'envisatja de faire de formacion dins l'encastre de l'EOE...

#### **Los partenaris**

Òc-bi fonciona plan en Aquitània, an recrutat un permanent.

Caldriá tanben comptar amb La Liga de l'ensenhament (cf. revista *Diasporiques* : [http://www.felco-creo.org/mdoc/popup\\_fr.php?id=522](http://www.felco-creo.org/mdoc/popup_fr.php?id=522) e la FCPE que sovent nos es favorable sul terren (cf. Lengadòc-Rosselhon o Sant-Affrica). Cal trabalhar ambe l'existent, es a dire las associacions de parents representativas.

Los collègas de Dordonha se cargan de far la tièra dels contactes e de seguir aquela question.

Al nivèl dels sindicats, cal que los collègas se i impliquen, que los sindicats son dins las comissions paritàrias d'afectacion, an tanben, sul plan nacional e local, de posicions sus las lengas de França (cf. sul sit FELCO : [http://www.felco-creo.org/mdoc/index\\_fr.php?categ=syndicat](http://www.felco-creo.org/mdoc/index_fr.php?categ=syndicat)). Aquelas posicions faràn abans amb la participacion dels collègas. Cal pas esperar que tombèsson d'en naut, s'implincar dins las preparacions de congresses, elaborar de mocions...

## Annèx 1 - Comunicat « Anem, Òc », junh de 2010

Communiqué « Anem, òc » - 17 juillet 2010.

- Les associations réunies dans la coordination «Anem Òc» au service de l'occitan-langue d'oc se sont rencontrées le samedi 12 juin à Carcassonne pour envisager les suites à donner à la manifestation de l'automne 2009, qui, avec ses 25 000 participants a marqué une fois de plus l'importance de l'occitan ou langue d'oc aux yeux d'une part importante de la population.
  - Elles réaffirment à nouveau qu'elles considèrent qu'il n'y a qu'une langue d'oc, que cette langue s'exprime à travers différentes variantes dans l'ensemble du pays d'oc.
  - Elles ont pris connaissance avec intérêt de la proposition de loi élaborée par des élus bretons, occitans et catalans de sensibilité différente, mais réunis par le souci de donner aux langues historiques de France le cadre législatif dont elles ont besoin.
  - La coordination «Anem Òc» fera connaître bientôt son analyse détaillée de cette proposition. Dans l'immédiat elle tient à féliciter ses auteurs, dont l'initiative contraste nettement avec l'inaction de l'actuel gouvernement sur ce sujet, en dépit de promesses faites en 2008 et visiblement oubliées depuis.
  - La coordination «Anem Òc» a suivi avec attention les résultats des élections régionales et suivra de près les initiatives qui seront prises en matière de politique linguistique pour l'occitan-langue d'oc. Elle rappelle son souhait de voir cette politique renforcée par rapport à ce qui existe actuellement. Elle souhaite plus que jamais que les régions dans lesquelles rien n'existe, ou fort peu, s'engagent enfin dans la voie d'une vraie prise en compte de la langue et de la culture d'oc. Elle renouvelle son appel à une véritable coordination entre les diverses régions de l'aire historique de la langue afin de permettre un développement harmonieux et cohérent sur l'ensemble de cette aire.
  - La coordination «Anem Òc» entreprendra dès le début de l'automne un travail de réflexion sur les modalités de ses actions futures. La manifestation du 24 octobre n'était qu'une étape dans la mobilisation. Celle-ci se poursuivra, et se renforcera.
- 
- *Institut d'Estudis Occitans (IEO), organisme culturel reconnu d'utilité publique.*
  - *Felibrige, mouvement de défense de la Langue d'Oc fondé par Frédéric Mistral.*
  - *F.E.L.C.O, Fédération des Enseignants de Langue et Culture d'Oc (Education nationale)*
  - *Calandretas, écoles occitanes associatives laïques,*
  - *OC-BI, association de parents d'élèves de l'enseignement bilingue public.*

Secrétariat : [comitat.anem-oc@club-internet.fr](mailto:comitat.anem-oc@club-internet.fr) - 04 42 59 43 96 / 06 77 49 37 78



